

MERKWAERDIGHE SLITINGHEN

II. 1402—1414.

(Vervolg van bladz. 66).

1402. **W**ant Lambert van Sulen ende Enghel, syn wyff, *two knechten daertoe ghehouden hebben, dat si een vrouwennaem ghewacht, gheslegghen ende seer mishandelt hebben*, daerom hebben Lambert van Sulen ende die twee knechten ghelegghen opt vleyshuys, ende syn hier ghecomen in hemde ende in broeke ter clocken, ende sellen den rade bidden verghiffenisse, ende Lambert sel gheven te beteringhe xxv^m steens, ende die twee knechten sellen gheven te beteringhe, elc van hem beiden xv^m steens, ende Lambert voersz. sel gheven te beteringhe der vrouwen, die gheslegghen is, xxv nye gulden.

Ende Enghel voersz. heeft ghelegghen op Sinte Katrinen poerte, ende is van daer hier ghecomen ter clocken, ende sel den rade bidden verghiffenisse, ende waert, dat si dusdanighe ofte desen gheliken saken ummermeer weer dede, so wout die raet vander stat veel swaerliker ofnemen dat een metten anderen (22).

1403. **W**ant Jan de Keyser *onredeliken te weghe*

ghevaren heeft met enen wtheemischen coepman, daerom heeft hi ghelegghen inden toern, ende is hier ghecomen, bloets heens, ter clocken ende sel den raet verghiffenisse bidden, ende gheven te beteringhe x^m steens (23).

1403. *Want Agnese Rondeels, onredelike tessinge ende quaetsprekinghe ghemaect heeft, daer groet misval of ghecomen mocht hebben, daerom verbiet men haer die stat, vyf jaren lanc, op een myl nader stat niet te wesen of te comen (24).*

— *Want Herman Ebben soen ende Matthys Rofst een moert ghedaen hebben aen een vroukyn, Patsscher wyff, ende aen haren kynde, daer si op haer wterste mede ghinc, daerom verbiet men hem die stat ende tlant van moert, c jare, op syn lyf (25).*

1404. *Want Willem Broek, die snider, hem selven syn ghelt ghestolen heeft, ende dat anderen goeden luden betegghen heeft, ende hi oec onredelike ghewandert heeft, ende bi nacht opter Bilten aen eenen huse ghestoten heeft, ende hem selven Archelsche ende onse vyant ghe-roepen heeft, daeromme is hi hier ghecomen in hemde ende in broeke, ende sel den rade verghiffenisse bidden, ende hi sel wilcoeren, waert, dat hi ummermeer onstantelike saken dede, dat hi dan een jaer lanc beneden inden roden toern legghen sel, ende eeten water ende broet, ende hi sel der stat te beteringhe gheven, xx^m steens (26).*

— *Want M^r. Jan vander Goude, die kokelaer, een vroukyn onredeliken ghesteken heeft, ende ghedwonghen heeft, dat si met hem most gaen*

slapen, ende dan voert wter stat gaen most, ende dat niet cronen, daerom is hi ghescuppet, ende hi sel x jare lanc wter stat wesen ende eene mile vander stat (27).

1404. *Want Nelle, die men heet dronken Nelle, ende grote Griet Schoenmakers opt Sant, ondaften ende onrusten in haren buerten dicke ghedreven hebben, daeromme verbiet men hem die stat een jaer lanc (28).*

— *Want Ghise, mitten Baerde, ende Trude quade Heynckyns wyff, tot menighe tiden onredeliken ende qualiken ghesproken hebben, daeromme verbiet men hem die stat v jare lanc ende ene mile vander stat (29).*

— *Want Jan Steen, enen doetslach ghedaen heeft aen Jan Boys, daerom heeft hi inden roden toern gheleghen, ende is hier ghecomen in hemde ende in broec ter clocken, ende sel den rade verghiffenisse bidden, ende gheven der stat te betteringhe xxviii^m steens, ende hi sel wilcoeren, den doetslach te suenen biden rade vander stat, soe wanneer des dode magen suen nemen willen biden rade voersz., ende dan sel Jan Steen borghen setten den rade, die suen te houden ende voldoen (30).*

1406. *Want Jan Paep, die Wlre, hem voertyts verwilcoert had op syn lyff, dat hi nummermeer ontstantelike saken doen en soude, ende daerenboven ondadeliken ende sonder bruec enen man ghesteken heeft, daer hi rechte voert mede ghedronken hadt, daerom sel men hem rechte voert wtleyden, ende slaen hem syn hoeft off (31).*

1406. Want Gheert Gheen, *menighe gewelds ende ondade ghedaen heeft* inden ghestichte van Utrecht, daeromme sel men dat rechten *metten zweerde* aen syn lyf (32).
1407. Want Jacob Waddinc van Rotterdam, *ghebeden heeft van Sinte Cornelis ende nyet beswct en is*, daerom stont hi ghisteren opte kaec, ende men verbiet hem die stat twe jaren lanc (33).
- Want Jan van Oudenborch, die men *paep Gruenkyn* heet, *onredeliken ghebeden heeft*, daerom verbiet men hem die stat twe jaren lanc (34).
- Claes, die Brabander, *die metten Pater Noster die lude te schieten* pleecht, sel men opte kaec setten nu na den eeten, ende schuppen, ende men verbiet hem twe jaren die stat (35).
- Want Roetaert van Arhem Vrederix sz., Arent Aerntkyn, ende Jan Meynaertz, die *stilleganemaker, goede vrouwen bi nacht onredeliken aengheverdicht hebben*, daeromme syn sy hier ghecomen ter clocken in hemde ende in broec, ende sellen den raet verghiffenisse bidden, ende Roetaert ende Aernt, sellen, elc den rade te beteringhe gheven L^m steens, ende Jan Meynaertz sel te beteringhe gheven xxv^m steens (36).
- Want Ditmaer van Straetsborch, die Pater Noster maker, bi Jannes den Pater Noster maker *hem qualiken bewyst heeft*, daer Jannes, Henric vander Lippen *sinen meyster doetghesteken heeft*, daerom heeft hi in 't vleys huys gheleghen ende is hier ghecomen in hemde ende broec ter clocken, ende sel den rade verghif-

fenisse bidden, ende gheven der stat te beteringhe xx^m steens, ende hi sel wilcoeren, waert, dat hi ummermeer onstantelike saken dede, dat men dat rechten sel aen syn lyf, ende hiermede sel hi onbelast blyven van des doden maghen (37).

1407. Want Jan Voghel, die mandemaker, *bi nacht ghewapent ghegaen heeft ende met veel steenen in enen huse gheworpen heeft*, des hi langhe misseken hadt, ende die raet nader waerheit gevonden heeft, daeromme heeft hi opt vleyshuys gheleghen ende is ghecomen ter clocken in hemde ende in broec, ende sel den rade verghiffenisse bidden, ende hi sel wilcoeren, waert, dat si ummermeer onstantelike saken dede, dat hi een half jaer lanc legghen sel inden roden toern, ende *eeten water ende broet* (38).

1410. Want Kye *indie Stove, inden langhen ganc, onredelic vechtelic ghemaect heeft ende ghewont heeft* Evert van Rantbroec van Amersfoerde, daeromme heeft hi opten vleyshuyse gheleghen, ende is hier ghecomen in hemde ende in broec ter clocken, ende sel den rade verghiffenisse bidden, ende die raet neemt hem syn borgherscap, ende hi en sel nummermeer borgher moghen wesen, ende hi sel Evert voersz., sinen meyster off doen biden rade vander stat, ende Kye sel Evert te beteringhe gheven xx gulden, de eenre helft tot Paeschen ende d'andere helft te Pynsteren naestcomende (39).

1411. Want Hans *metten crwfden hoofde, inden ghestichte van Utrecht bi nachte den luden hoerpeerden ghestolen heeft, die luden beroeft heeft*

ende veel ghewelden ghedaen heeft, daerom sel men hem rechtevoert wtleyden ende rechtent metter galghen aen syn lyf (40).

1411. Want Jan, Jan Boudens soen's soen, *in vreenschappen gheschoppet heeft voer een doer, ende daer inghelaten is, ende hi daerenboven daer inden huse enen knecht gheslegghen heeft, ende daer onruste in ghemaect heeft, daerom heeft hi opter poerten ghelegghen, ende is hier ghecomen in hemde en broec, bloets hoefts, ter clocken ende sel den rade verghiffenisse bidden, ende sel te beteringhe gheven twe keersen indie buerkerc, elc van een pond was, die een voer onser vrouwen ende d' andere voert heilighe crws, ende daertoe sel hi onser stat te beteringhe gheven x^m steens (41).*

1412. Want Jan de Zwarte, onsen rade ende systeesteren, *doe syen voer syn verboerde koren panden souden, veel onredeliker quader woerde ghegheven heeft, syn mes ghewyst heeft, daerom heeft hy op 't vleyshuys ghelegghen, ende is hier ghecomen ter clocken, bloets hoefts, ende sel den rade verghiffenisse bidden ende onser stat te beteringhe gheven v^m steens (42).*

— Want Corstoffels die Heer, wt onser stat *enen priester van Deventer vervolcht heeft, den priester opten weghe ghetueft heeft ende gheanxt heeft, ende tot gheloften heeft helpen dringhen, daerom heeft hi opt vleyshuys ghelegghen, ende is hier ghecomen in hemde ende in broec ter clocken, ende sel den rade verghiffenisse bidden, ende hi sal wilcoeren, waert, dat hi um-*

mermeer onstantelike saken bedreve, dat hi dan inden roden toern legghen sel, een half jare lanc, ende eeten water ende broet; ende dat yerste de priester binnen onser stat comt, soe sel Corstoffs in der kerken ten Doem comen, selve derden, bloets hoefts, ende den priester verghiffenisse bidden, ende den priester qwyt schelden, van alle gheloften, die hi aen Corstoffs hant ghedaen mach hebben (43).

1412. Want Jacob Ruleckyn *bi nacht ghecomen is in enen huse ende daer die keersen wtghedaen, ende heeft daer helpen twe goede mannen, sonder veten ofte hueden, doen slaen ende van afteren doersteken, ende daerof myede ende ghelt ende have ghenomen heeft*, daeromme sel men dat rechten als een ondaet aen syn lyf *mitten rade* (44).

1413. Want hier een knecht gheweest heeft, *die hem selven Gheryt vander Haer, Bokels oudste soen van der Haer, ghenoeemt heeft, des hi niet en is*, mer, die syn rechte naem is Gherbrant, Gheryt Gherbrants soens soen, van Enchusen, also Gheryt Gherbrants soen, syn vader, hier teghenwoerdich, dat selver beleit ende bekennet, ende dat lyflic ten heilighen ghesworen heeft voer onsen rade, dat dese knecht syn bastert soen is, ende hi dien hadde ende wan bi enen wyfkyn van Enchusen, gheheten Siborch Hens, die langhe doet is ende daer op ghestorven is, dat hi Gheryts soen is, ende onse raet dat oic met veel onderscheideliker konden ende meer ghetughen also ghevonden heeft;

ende want dese knecht hier mede groet gheruft ende moeyenisse in onser stat ende inden lande hier mede ghemaect heeft mit groten onrecht, ende Bokel vander Haer ende sinen goeden wive oec grote smedenisse, oncost ende moeynisse ghedaen heeft, daerom verbiet men Gherbrant, Gheryts Gherbrants soens soen van Enchusen voersz., onse stat, ende een mile van de stat te wesen, hondert jaer lanc, op syn lyf (45).

1413. Want Jacob Henricx soen *versuec ghedaen heeft, om volc te vergaderen, groet perlement ende groet vechtelic in onser stat mede te maken, ende veel tessinghe in onse stat ghemaect heeft*, daerom sel hi een jaer lanc beneden inden toern legghen, ende nyet eeten dan water ende broet, ende daer tendens niet wtcomen, dan hi den rade, out ende nye, ende die raet neemt hem syn borgherscap (46).

— Want Peter vanden Wyel *vanden rade aengesproken is ende daerop gheet is, van saken, die hy wist, ende bi sinen eede verseken heeft, ende raet daerna ter waerheyt ghevonden heeft, dat hi die saken wel wist*, ende hem die bekennede te weten voer goede luden, daerom kundicht de raet Peter van Wyel voersz. *meeneedich*, ende men neemt hem syn borgherscap, ende men verbiet hem die stat c jaer lanc ende een mile vander stat te wesen op syn lyf (47).

— Want Roelof Brunys soen, Evert Peters soen, *metten verbernden aensicht*, ende Tye Klinckaerts, boven verbot 's raets, *binnen der kerken hebben gaen bidden*, soe sullen si tus-

schen dit ende een sonnendaghe naestcomende bi-
der sonnen wter stat gaen ende een jaer lanc vter
stat wesen; ende quamen si, ofte enich van hem,
hier en boven in die stat, so soude men se vast
legghen, ter tyt toe, dat se wtbliven souden (48).

1414. Want Corstoffel die Heer, die ternincmaker,
voer tyts verwilcoert is, een half jaer inden ro-
den toern te legghen, of hy enighe onstantelike
saken dede, ende daerenboven veel onredelike sa-
ken bedreven heeft, daerom sel hi een half jaer
int nederste vanden roden toern legghen ende
eeten water ende broet, ende de raet neemt hem
syn borgherscap, ende als hi wtcomt, sel hi
wilcoeren, waert, dat hi ummermeer onstantelike
saken bedreve, dat ment rechten sel aen syn lyf (49).

— Jan Post is doet ghebleven andere daghen int
vleyshuys, daer onse raet toe gheset heeft, ende
heeft ter witteliker waerheit ghevonden ende wt-
ghegaen, dat Lambert Swsmantel of yemant
anders daer gheen scout aen en hebben ende des
onschuldich syn, sulc Jan Pot voersz. hem sel-
ven dat ghedaen heeft, daeromme verbiet de raet
alle Jans maghen, ende vrienden, dat si wil-
coeren, Lambert voersz. of niemant en mis-
doen, of die raet wout scherpelic aen hem
rechten (50).

(Het vervolg hierna).

J. J. DODT VAN FLENSBURG.